



Mpho e sa lebellwang

Sesotho



Harold Gondwe

Mpho e sa lebellwang

E ngotswe ke Harold Gondwe
Motaki wa ditshwantsho ke Heidi-Kate Greeff



E fetoletswe ke Mpho Ntaka



Kajeno ke letsatsi la tswalo la Letlotlo.
Letlotlo o qeta dilemo tse leshome mme
o thabile haholo. Batswadi ba Letlotlo ba
etseditse Letlotlo mokete.

Ba ne ba mo reketse kuku e kgolo e nang
le setshwantsho sa bolo.

Ho ne ho e na le dijo tse ngata tafoleng
ya ho jella ho kenyeletswa dipompong le
dinomaphodi tse lokelang ho ba teng bakeng
sa ha o entse mokete wa letsatsi la tswalo.

Ba lelapa la boLetlotlo ba ile ba mo fa dimpho,
metswalle ya hae le yona ya mo fa dimpho
mme kaofela ha bona ba ne ba kgahlilwe ke
kuku e nang le setshwantsho sa bolo.

Metswalle ya Letlotlo e ne e jele kuku mme
hobane e ne e le kuku e kgolo, ha ba ka
ba e qeta.



Ka mora mokete motswalle wa hae e leng Kgahleho a sebela Letlotlo ho hong mme Letlolo a araba a re,ho lokile motswalle wa ka, ke tla tla hang ha re qeta ho phutha ditulo, nthuse hore re tle re qete kapele.

Ba phutha ditulo, ba thonaka dipampiri tsohle mme ba qeta ho etsa seo kapelenyana.

Letlotlo o ile a kopa tumello ho Mme wa hae hore a ye ho lata mpho ya hae ho Kgahleho.



Mme wa Letlotlo a botsa Kgahleho hore ke hobaneng ha a sa a a tla le mpho eo nakong eo tlang moketeng.

Ke e fihetse ka phoso Mme, ha araba Kgahleho ka setshehonyana se bonolo.

“O tlameha ho kgutlele lapeng ka pele hobane wena le motswalle wa hao ha le kopane, le bapala ho fihlela e eba mantsiboya” ho rialo Mme wa Letlotlo.



Letlotlo ke kopa o nkemele mona ha ke ilo lata mpho ya hao, ho rialo Kgahleho.

Letlotlo a sala mme o ne a ipotsa hore na motswalle wa hae o mo reketse mpho ya mofuta ofe.

O ile a emela motswalle wa hae ho fihlela a kgutla, hang-hang Kgahleho a hlaha a nkile lebokoso le lenyenyane. Ke eng e ka lebokoseng? Letlotlo a botsa motswalle wa hae.

Mahlohonolo a letsatsi la tswalo motswalle wa ka, mpho ya hao ke ena, ke tshepa hore o tla e rata, a rialo a bososela.

Kgahleho a fa Letlotlo mpho ya hae. Ha a sheba ka lebokoseng, o ne a sa kgolwe seo a se bonang. A fumana ntjanyana e ntle eo a e ratang.



Motswalle wa ka! O tsebile jwang hore ha e sa
le ke ntse ke batla ntjanyana?

Ke ne ke o utlwa ha re ne re bua ka diphoofolo
hore o rata dintja.

Ke kopile ntjanyana ena ho ntatemoholo eo
ntja ya hae e nang le madinyane a mane.



Letlotlo a botsa a tsheha ka ho hloka
boitshepo ,na nka phahamisa ntjanyana?

Ena ke ntja ya hao, e nke motswalle wa ka,
ke qetile ka mosebetsi wa ka,ho rialo Kgahleho.

Ke se ke na le lebitso la yona, ke tla e rea lona
hona jwale, ha rialo Letlotlo a tshwere lebokose.

Helang! o se o na le lebitso la yona
kapelenyana tje! Kgahleho a botsa a maketse.

Lebitso la ntja ya ka ke Chicco.



Chicco a qala ho tsoka mohatla a thabetse ho ba le Letlotlo.

Chicco ke ntjanyana e tshweu ka mmala mmeleng mme e na le letheba le letsho hloohong.

Chicco e ne e etsa lerata le bonolo. Letlotlo o ne a sa tsebe hore na a reng ho ntjanyana ya hae.

O lokela ho bua le ntja hore e tle e o tlwaele Kgahleho a eletsa motswalle wa hae hobane a ne a bona hore o ferekane.

Jwale ke a tsamaya Kgahleho, ke a ipotsa hore naa ebe Mme o tla reng ha a mpona ke tla le ntjanyana ena.



Ha Letlotlo a fihla hae a pata ntjanyana ka mora ntlo. O ne a tshohile hobane o ne a sa tsebe hore na o tla tshwara ntjanyana ya hae jwang.

O ile a utlwa Mme wa hae a mmotsa hore na o kgutlile?

A qala ho tshoha hobane Mme wa hae o ne a sa batle dintja, a re dintja di a kgathatsa.

Ee Mme, ke kgutlile tloho o tlo bona mpho ya ka, ho rialo Letlotlo.



Mme wa hae a tla, ha a bona ntjanyana eo a makala a re Ntja ke mpho! A botsa a ntshitse mahlo a maketse.

Letlotlo, ke kopa o hlokomele ntjanyana ena, ha ke batle ho bona mantle a yona hohle mona a potoloha jarete. Na e be wa nkutlwa?

Ke tla e hlokomela Mme ntjanyana ya ka ke a o tshepisa, ho rialo Letlotlo mahlo a hae a shebile fatshe.



Bosiu ba pele bo ne bo le boima ho Letlotlo hobane ntjanyana ya hae Chicco e ne e etsa lerata bosiu kaofela.

Chicco e ne e sa batle ho robala kantle e le nngwe mme Letlotlo a qetella a e kentse ka ntlong.

Qetellong Chicco e ile ya tlwaela ho robala ka ntlong ya yona e neng e le kantle.

Ntjanyana e ile ya qala ho hola mme e ne e matha le ho bapala hammoho le Letlotlo.



Chicco e ne e ja dijo tsa dintja tse entsweng le ho kengwa ka hara makotikoti. E ne e thabela dijo tseo haholo.

Ka nako tse ding di ne di kopanngwa le dijo tse setseng ka sehatsetsing. Letlotlo o ile a rekela Chicco masapo le dibapadiswa tsa dintjanyana ebe o bapala le yona a e lahlelle tsona.

Ke moo Chicco a tlang ho tlola, a mathe ho ya tshwara dipadiswa tseo.

E ne e re ha nako ya ho hlapisa Chicco e fihla, e ne e ye e ipate ka mora ntlo hobane e ne a tshaba le ho sa rate metsi .



Ka letsatsi le leng, ha Letlotlo a fihla hae a etswa sekolong, o ile a lokisa dijo tsa hae tsa motsheare jwaloka tlwaelo, a bula ka sehatsetsing mme a fumana sopho e nang le masapo, a e futhumatsa hammoho le papa mme a dula fatshe a ja.

Hang ha a qeta ho ja, Mme wa hae a fihla mme a bula sehatsetsi a botsa naa ebe Chicco o se a jele?



Tjhee Mme, Chicco ha a so je, ke ne ke ntse ke ja pele, ho araba Letlotlo a qeta ho ja.

Jwale, sopho ya hae e neng e le ka sehatsetsing e kae? Mme wa Letlotlo a botsa a ntse a sheba sheba ka hare ho sehatsetsi.

Ha a ntse a qamaka jwalo a bona sejana se neng se tshetse sopho ya Chicco moo ho neng ho hlatswetsa dijana tse ditshila teng.

Letlotlo! Naa o batla ho mpoella hore ke wena ya jeleng sopho ya Chicco? Ho botsa Mme wa Letlotlo a tshohile.



Ke ne ke sa tsebe hore ke sopho ya Chicco, sefahleho sa Letlotlo se ne se fetohile mme abatla ho hlatsa dijo kaofela.

Tjhe! o ke ke wa hlatsa letho hobane o se o kgotse mme dijo di se di le ka mpeng ya hao, ho rialo Mme wa Letlotlo a ntse a tsheha.

Ho bolela hore ke tla kula? Ka nako eo Letlotlo o ne a leka ka thata ho hlatsa mme dijo tsa hana ho tswa.



Ka nako eo, Chicco ene e eme pela monyako, e bohola, e emetse Letlotlo hore a efe dijo tsa yona e le hore ba tle ba ilo bapala ka mora hore e je.

Letlotlo ipotsa potso a re: "Ke mpho e jwang ya letsatsi la tswalo bona jwale ke jele dijo tsa ntja, naa ebe ke tla phela?"

O ne a ikutlwa a se a se monate eka o a kula. Yaba o fetola maikutlo mme a re:

"Haeba Chicco a ntse a phela, ho bolela hore nke ke ka shwa."

DITEBOHO

E ngotswe ke

Harold Gondwe

Motaki wa ditshwantsho ke

Heidi-Kate Greeff

Mohlophisi

Mavis Ndlovu

Moqapi

PixelPing Design

Mofetoledi

Mpho Ntaka

Mosireletsi wa Boleng

Matebogo Makhutle



ISBN 978-0-638-00785-5



basic education
Department:
Basic Education
REPUBLIC OF SOUTH AFRICA

